

Incumbensa da la fracziun da la PBD concernent in program d'impuls per l'economia grischuna

La pandemia dal coronavirus ha tutgà l'economia grischuna sin il viv. Grazia ad emprimas intervenziuns da la Confederaziun e dal chantun (lavor reducida, credits COVID, fond per cas da direzza) è vegnida impedita ina reducziun massiva u schizunt in collaps da l'economia. Tuttina èn numerusas investiziuns vegnidas spustadas u suspendidas pervia dal coronavirus, e la vista malsegira sin noss turissem d'enviern talmain essenzial è vinavant ina ristga considerabla. La fracziun da la PBD dal Cussegl grond è perquai da l'avis ch'i dovria ussa svelt e sistematicamain mesiras che sustegnan l'economia grischuna, en spezial las interpresas pitschnas e mesaunas (IPM) ed il turissem. Mesiras che dattan a l'economia dal Grischun segirezza sco en la fasa 1 da la pandemia dal coronavirus, per ch'i vegnian debloccadas investiziuns ed innovaziuns privatas.

En il center na stattan per la fracziun da la PBD explicitamain betg contribuziuns finanzialas à fonds perdu, mabain plitost mesiras per promover projects gia planisads ed il sustegn tras la creaziun da cundiziuns generalas favuraivlas per IPM, eventualmain er da durada limitada (tras la sunset legislation). Quai po il chantun per exempel far cun fixar vinavant finamiras da pajament a fitg curt termin, cun focussar las directivas da surdada resguardond il meglier pussaivel e confirm al dretg interpresas dal Grischun u cun examinar las taxas en vista al princip da la cuvrada dals custs che vala tuttavia. Il punct decisiv è quel ch'il pachet da mesiras vegn elavurà e preschentà bainbaud en moda vasta sur l'entira administraziun.

La fracziun da la PBD pretenda perquai da la Regenza:

1. Al Cussegl grond duai vegnir preschentà bainbaud in program d'impuls cumplexsiv per promover l'economia grischuna.
2. En connex cun l'elavuraziun duai vegnir resguardà primarmain in sustegn betg finanziel, e mo nua che quai è necessari e cumprodamain efficaci duain vegnir proponidas contribuziuns finanzialas.
3. Sco part dal program d'impuls duain vegnir elavuradas ensemen cun ils partenaris dal turissem mesiras per minimar la ristga d'ina gronda perdita per il turissem durant la proxima stagiun d'enviern.

Cuira, ils 19 da zercladur 2020

Hohl, Loi, Michael (Donat), Aebli, Bettinaglio, Buchli-Mannhart, Casty, Clalüna, Danuser, Ellemunter, Grass, Gugelmann, Hardegger, Hefti, Lamprecht, Müller (Susch), Niggli-Mathis (Grüsch), Papa, Tanner, Widmer (Favugn), Widmer-Spreiter (Cuira), Zanetti (Sent)